

宋詩紀事補遺

宋詩紀事補遺卷之六十七

歸安陸心源伯剛父輯

陳文蔚

文蔚字才卿上饒人朱子門人自號克齋隱居

不仕著有克齋集

徐敬甫出示所居之別墅南巖圖

憶昔同作康山游杖屨厯徧千岩幽知君已具看山  
眼每遇勝處嘗淹留從茲一去間何澗倒指殆欲忘  
春秋不知此地復何地但見大江東去流相逢恍然  
如隔世盡洗積年離別愁首爲袖出南岩圖着鞭先

我占一邱南岩之高不可攀俗駕欲到何緣絲君乃  
結屋於其巔避世擬追園綺儔雪飛霜瀑自天落戟  
列萬竹千雲修客來煮茗話疇昔酒熟春禽相勸酬  
自言得此已足老豈復更懷身世憂無心偶作雲出  
岫良念棣萼情綢繆對牀聽雨有真意肯放拂衣歸  
去休登高一日展遐眺洗眼九華雲漬收語我南岩  
卜築地只放五老高一頭丹梯萬丈徑可躡獨恨未  
遂曾往謀我生亦有山水癖欲見未見心先投長哦  
南山白石爛夢寐滄江飛白鷗歸與亟辦買山計甘  
與世好相盾予采蕨可以忘朝飢種橘自當千戶侯

眷言志事在畝畝適我願兮遑他求此時作書報同  
志知肯遠爲題詩不

石潭道中追賦大江

我生大江東與江不相識一日作遠游江頭目因極  
桃花春未漲水落畧見石望斷淮山青隔岸纔咫尺  
恃此一葦航焉能限南極雲屯十萬衆守衛以人力  
撫御有良將成城衆心得江淮唇齒勢如家護牆壁  
守淮卽守江淮民須愛惜我朝聖澤深不在險在德  
慈儉今天子遐邇無間隔大臣百執事根本共培植

送趙德勤將漕淮東

登亭每憶楚東時把酒吟詩對落暉拭目正看黃鵠  
舉回頭不奈白雲飛未應失計荒茅屋正坐無錢買  
釣磯畝畝有懷長抱膝論思惟日望公歸

送趙國宜赴筠州戶掾

苦無多路旅程寬正是江南絮打團欲濕征衣梅雨  
細不成客夢麥秋寒官閒詩可頻搜句親近書宣日  
問安自笑無才愧之子明時君祿詎能干

月臺觀月

臺高無奈月明何豈憚追攀上岌峩萬壑秋聲歸草  
木百年鄉思動關河遙知素影千家共不獨秋光此

地多中夜酒酣狂欲舞停杯且復聽吳歌

以上江  
西詩徵

沈宏甫

著有齊瑟錄吳泳爲序

詠瑟師

宇宙浩浩誰詩鳴遺響閑寂如英莖更無高談細論  
者唐末婀娜江西清鶴林集

陳應龍

字定夫福建寧德人精尚書春秋又喜讀孫吳  
書嘗試右庠陳傅良置之首選授修仁尉

呈徐憲應

朱詩六十七  
弱冠弄筆硯恥爲章句儒夜半劍氣發精光射天衢  
欲分天子愛張燈閱地圖七闢山水秀我亦思故廬  
世事苦齟齬吾道盪躡躅一官如涕唾焉能輕重吾  
宦德志

李璉

與蘇洞同時

題蘇召叟金陵雜興詩後

長干小婦學吹簫樓外間風弄翠條近得廣陵消息  
未暮潮已過赤欄橋

江水無情碧草春北朝留住老詞臣子規啼上青楓

樹爲爾離鄉去國人

雲杪熒熒一塔燈覺皇舍利寶烟凝山門推上三更  
月似賄前朝禮拜僧

南軒隱約夜聲微獨詠齊梁綺靡詩鬼火對山青焰

短依稀憶得獨眠時

冷然齋詩集

李錫

眉州人燾孫官宣議郎

金紫巖

百尺雲巖道院邊曉鐘疏磬思悠然荷間酌酒和清  
露石上題詩染翠烟半嶺泉鳴通古澗數家秋盡隔

寒川西風似欲吹人起去逐騎鯨汗漫仙

眉州屬志

傅子雲

子雲字季魯金谿人陸象山門人嘗主歐寧簿  
著有易傳論語集傳中庸大學解孟子指義離  
騷經解并文集

贈桂琴隱先生

五載飛鷹迅孤蹤病馬羈望東嘗把酒傾蓋便論詩

玉在山俱潤泉寒練正垂一雛方刷翼行矣陟天池

江西詩徵

史達祖

字邦卿號梅溪汴人嘗爲韓侂胄堂吏撰梅溪

詞一卷

清明

一百六朝花雨過柳稍猶爾病春寒晉官今日炊烟  
斷併著新晴看牡丹

宮燭分烟眩曉霞驚心知己度年華榆羹杏粥誰能  
辨自採庭前薺菜花浩然齋雅談

何 鑄

字叔京邵武人兒子從朱子遊以父恩補安溪  
簿調善化令卒朱子銘其墓學者稱壹溪先生

箸述甚富

七臺山

一上青雲梯杖藜披素襟追隨同聲客不作殊方音  
過雨飛重泉積烟昏茂林疊嶂杳峭崿竦峯起嶇嶼  
仰闕天門開俯窺地戶深丹壑收暝色絳霞結幕輕  
天空抗高館嵐散凌孤岑滄海飛赤鳥疎林散黃金  
彷彿天仙來逍遙上帝臨雷電屢興滅日月相深沈  
遐討挹元氣冥搜清道心

邵武府志

董眞卿

德興人字季眞父鼎受業于朱子眞卿潛心學

問尤遠于易著有周易會通

屏風山

岩岫迴環四境同東山橫展畫屏風

德興縣志

竇從周

丹陽人志尙冲雅年五十偕弟澄往建陽從學  
朱子得操心之要歸築室講道專言爲己之學  
盜入其室知爲從周去之文公聞而嘆曰忠信  
可行于蠻貊信然

送僧還日本

榜人理行艤日出江水平扶桑渺何許萬里浮滄溟

上人國之彥夙悟最上乘慕此中華風一錫事游行  
名山與奧谷足跡已徧經日予處闌闌幸矣識韓荆  
論論詩坐終日問法天花零相得臭味同藹藹芝蘭馨  
豈比錢刀徒市利紛以營去去須臾間何以展我情  
江草色萋萋江花亦冥冥浮雲聚復散不能常合并

隣交徵書初篇

楊芳

字子長汀州人朱子高弟任縣丞佐政有聲後  
署靖安令不下堂階而治

題官舍

堂上官人似散人村人相見且相親高陂約水歸田  
急不管灘聲入縣門

武寧縣志

王邦叔

不知何許人張紫陽弟子

呈紫陽

月照長江風浪息魚龍遁迹水天平箇中誰唱眞仙  
子聲滿虛空萬籟清

鏡明澄靜萬綠空百萬絲條處處通斗轉星移人睡  
定覺來紅日正當中

羅浮志

唐人鑑

字德明零陵人好學能文築室於州學之西植竹萬竿楊誠齋名之曰玉立齋

答誠齋問卜

聞爇爐香要決疑不宜何用卜蓍龜聖人自有韋編  
在進退存亡豈不知沅湘耆舊傳

葉述

甯宗時人

毛希元隱居廬山卧龍瀑

毛子罵吳曠蜀山渺孤猿五老急扣聘延留如大賓  
龍分自眠地蕙帳饒珠蠻巖花開恨晚谷鳥鳴先春

弔古一沈思千載多逸民登高一長望萬里皆積雲  
子勇書印厯憂憤着彌綸曷不草露布從容靜風塵  
低頭汲澗曲煮豆箕爲薪沮溺士之恥昔賢終賤貧

九江府志

蘇 詠

字伯茂金華人轍元孫以祖簡恩任紹興嵊縣  
主簿再中漕舉知嚴州建德縣監都進奏院丁  
父憂免喪添差通判幹辦諸州糧料院司農寺  
主簿將作丞補外知衢州福建提舉就除通判  
轉朝散大夫

次韻張正民遊智者寺

養拙何所詣白晝門常關剝啄有好懷遙郭橫秋山  
佛廬占山麓清淨非人間曳杖得晤語幽尋爲怡顏  
三峯聳而秀羣巘抱以環寺同喬木古僧與白雲間  
一鳥不復鳴流泉自潺湲山林足勝蹟世路羊腸艱  
至後書事

歲盡意不盡日長愁更長將士介生蟻黔黎痕復瘡  
拂膺念江夏掩面向山陽大隱未高枕巨鼈仍望洋  
舊聞死可禱或以酒自戕廢卷三太息撫時徒感傷

賦雪梨寄二孫

梨乃北方果東陽有遺種開花如雪潔結實論斤重  
似聞風霜來採摘不旋踵膚瑩玉在手剖之醴泉湧  
甘涼宜解醒席上賈餘勇甚美非耐久靡潰失前寵  
長安疑父祖壓沙豈伯仲時方禁苞苴林下喜得共  
老人齒頰寒食指難爲動鄰牆有酒仙雙苞可持送

同諸孫賦冰筋

雪堆屋背已崔嵬溝瓦垂冰凍不摧乳石駢羅疑在  
谷遺簪璀璨儼成堆汎寒侵被憐衰老咀嚼鳴牙憶  
尚孩自古中原驗時令江南春候亦難裁

次韻徐惇濟久不食肉

舉家食肉迹難陳  
端有寒儒繼後塵  
杜老長饑聊卒歲  
顏生陋巷不逢辰  
啖毡竊喜全高節  
食肉從來鄙要津  
捫腹祇應多愧負  
天教吾黨合清貧

敬鄉錄

彭 侯

崇安人官朝議大夫

拯攬試于京師以詩勉之

送汝趨京邑休辭馬上塵  
人知官祿貴家爲買書貧  
淬礪先修業□騰欲奮身此行偕攬轡同醉杏花春  
萬姓統譜

冷應澂

字公定號覺齋江西分甯人寶慶元年進士官至寶章閣直學士廣東經畧安撫使宋史有傳述懷

位列三台貴旌旄障雨深仁廉兩個字忠孝一生心  
出省輕侯印歸甯問俸金攜家半窗月擣轉古榕陰

謝御賜紫金魚袋烏紗象簡

日映恩暉殿深君恩稠疊駕親臨褒衣紅濯天機  
錦束帶黃分內帑金何幸清班容宦轍自慚白髮點  
朝簪撥亂致治平生學消得君王念苦辛

義甯州志

聽月樓

聽月樓高接泰清樓高聽月最分明轉空軋軋冰輪  
響擣藥叮噹玉杵鳴樂奏廣寒音細細斧侵丹桂韻  
丁丁更須一派天風起吹下嫦娥笑語聲義甯州志

姚望之

字肖呂福建寧德人寶慶二年進士趙葵恢復  
三京辟爲幕屬

汴京

笛裏關山今幾年故都宮闕尙巍然八陵蒼莽知何  
地九廟英靈如在天重整六軍嚴宿衛旋興百堵慰  
民編微臣董役慚無補擬繪新圖獻榻前

龜山禪寺

萬山深處遠輪蹄古寺雍熙詔賜題坐望竺乾諸佛  
近徙憑茵閣十方低靈岩頻見元猿度琪樹應招白  
鶴棲不覺勝游天已晚一痕新月印前溪寶德志

鄭宅心

永福人寶慶二年進士累官常州軍事推官

題朱文公唐石墳庵

雲谷高風挽不留尙餘書澤賁松楸山瞻泰華岩岩  
聾水接濂伊混混流千古爲渠開日月百年知我有  
春秋自怜晚學無仙骨空把遺編記話頭截江網

桂柔夫

柔夫貴溪人寶慶二年進士

贈桂琴隱先生傳子雲韻

君是軼羣者當知不可羈淵源象山學聲價鯉庭詩  
要路足將策高雲翅肯垂餘波幸沾丐活我出汙池

江西詩徵

錢璧

寶慶二年知新城縣

停雲軒

插空軒檻扁停雲雲本無心豈解停歛散卷舒渾在

我本來明月一天青

新城志

陳鑄

字鼎臣閩縣人寄居嘉興襄七世孫寶慶中進士累官朝請郎主管玉局觀福州通判

昇山祠堂

任公何代此昇仙萬仞仙臺倚翠巔石徑層層封綠蘚松蘿步步拂青烟海中島嶼分諸國野外雲霞萃一川賢守乘秋縱登賞不妨吟到夕陽天

三山志

師顯行

字內機眉州人寶慶進士寶祐間知福建泰寧

縣景定四年知惠州政尚簡靜公暇手不釋卷  
著有文鑑集註

見日庵舊址

跨鶴驂鸞訪穉川松風吹散鐵橋烟聯登百步眼萬  
里長嘯一聲身九天倚大石樓敲竹杖躡飛雲項着  
吟鞭而今飽挹羅浮秀未服靈丹亦是仙

羅浮志

吳從善

從善江陰人寶慶進士自號無箸居士

游虎邱山

樂聲隨轉闔閭城檣杪無風水自平不待尊前催畫

燭落霞明月送船行

兩岸黃堆糴  
輕香月波金瀉亂  
波光不驅風露歸囊  
錦安得新詩  
鬱鬯涼

虎邱志

陳 埞

字子爽崇德人累官太府卿厯吏戶兵尚書除  
端明殿學士提舉太平興國宮卒謚清毅著有  
續鑑隨筆

極目亭

誰知極目名亭意不在登臨與品題天地兩間同汗  
漫江淮一水自東西驚棲何日能歸雁靈異當年任

照犀萬境盡從心上化靜參飛躍悟端倪

宋詩拾遺

曾夢選

寶慶時廬陵人

送胡季昭謫象州

象州銷黯又欽州道路何辭作遠游投北誰憐新逐客落南不減舊編修江山在處猶加護廊廟諸公底著羞天定從來人可勝著書消日海西頭

見象臺首末

李元實

寶慶中人

送胡季昭謫象州次王盧溪送澹庵貶新州

韻

知公不怕鬼門關直氣橫於清禁閑鵠臂明知林甫  
毒鯀言要與澹庵班一身渠任黃茆裏千古名標青  
史間非晚清朝邪正辨紫薇紅藥待君還

清名傳播到黃支直節甯憂趙氏危虎尾蹈時都不  
畏象臺到日大爲奇是行廊廟人皆怍所過山川鬼  
亦知官職本爲錫底鳩傷今正論有誰持

再作十絕寄胡伯負兵侍仲方尚書

文昌武庫九霄中翁是新州老澹翁應念象臺今日  
客清風端與我翁同

公家富貴足掀天都出新州十九年若念象臺今日  
客方知澹老子孫賢

官職廬陵不是無文章更亦擬歐蘇若言直氣橫牛  
斗但見人間說姓胡

赤手批鱗事最難況渠班底一微官澹翁去後能如  
此當作三生石上看

澹翁直氣貫三才八座雲仍漸上臺料想而今問底  
事中心應亦念其回

朝行多少氣英英不怕霜朝曲鬚鷹一網而今都打  
盡廬陵人且說廬陵

紹興秦檜秉洪鈞譖老昌言斬檜秦猶恨日來三四子抗章不說斬奸臣

一從藝祖握乾符元氣都憑直氣扶若欲皇家宗社永胡家直氣豈容無

東西兩浙及閩川皆見駕行有直言若我江西獨鉗口清翁入地也埋冤

寄語朝家廊廟人新州奇事又從新肯甘富貴忘他底應爲斯人作好春以上見象臺首末

蔣孝言

寶慶時武進人

游虎邱

秀色回環眼倍明  
醒餘灑面竹風清  
快哉氣且吞雲夢  
便欲飄然上玉京

虎邱志

鄭有年

寶慶時福建人

青霞谷

少室隱居空索價  
北山俗駕費移文  
道人笑破世間事  
去住身心如白雲

羅浮志

翁

定

厲有

賀帶湖六十三

風吹仙夢落江南  
忽忽今年六十三  
嗜酒引壺傾臘蟻  
揮毫落紙食春蠶  
行看仙籍香浮桂  
榮看恩袍色  
鬪藍他日投簪松徑下  
摩挲銅狄對清談

載江網

錢元忠

字子才

寶慶丁亥重陽前一日偕郡守游蒼玉洞因成八十四字刻於石

峭崿亂石滿陵岡  
顏色蒼潤如琳琅  
神惻鬼□□□  
慘牛眼虎跳深伏藏  
太湖靈璧不足數  
涪水口麥熟可方剝  
苔剔蘚驗古刻諸賢

缺

騰光茫如此至寶豈

易得宜檄山靈護缺却恐六丁下取將

長汀縣志金石

平

王鐸

惠安人紹定元年進士淳祐四年提舉廣東常

平

蝴蝶洞

莊周已與蝶俱飛說着遺衣事可疑只怪山中蝴蝶  
洞仙家四季總春時

羅浮山志

江鉢

字貴叔崇安人紹定戊子鄉薦受業于魏了翁  
講明正學修身不仕

隋隄柳

錦纜龍舟萬里來醉鄉繁盛忽塵埃空遺兩岸千株  
柳雨葉風花作恨媒

全閩詩話江銢聰敏絕人十歲應童子科賦並蒂梅詩聞者嘆賞紹定中與兄鎔再舉於鄉後受業魏了翁遂高卧廬山講明正學嘗賦隋隄柳云云

孟點

紹定元年知餘姚縣淳祐元年朝請大夫直秘閣江東運判權太平州

龍泉山詩

汙瀆橫鱣鯨蠻得而制所據非所容悲歎生賈誼

吾疑洛陽叟所見未超詣卷之不能伸無乃爲形累  
竭來姚江濱稽首龍山寺泓澄尺餘水龍乃于此憩  
飲之還可小泥蟠縱兀肆乘時大其用雲行復雨施  
出無而入有莫得窺其際茲龍之爲龍所以超萬類  
彼哉橫江鯨舟楫訖吞噬莫知屈伸理已大不可細  
滄溟有時竭譽叢何足恃惟龍神以天不足以跡泥  
洪濤再翻播勺水或游戲江河固所便岩穴亦可寄  
深潛若終隱奮迅倏已逝小大無定名變化莫擬議  
吾聞黃面老法門傳不二細能入無閒大可周天地  
芥子納須彌妙語言下契蟄龍徘徊久其亦悟此意

餘姚志

勸農卽事

阡陌躬行謹邵農平郊快馬蹴東風土膏流潤雨初足花錦暄晴春正中旗陣折旋知路曲樂聲遞響覺山空長官元是扶犁手樂與耕夫笑語同截江網

黃伯樞

字榮仲江西南城人紹定二年進士

讀馬援傳詩

後車薏苡落讒人珠貝文犀竟失眞馬革裹尸猶不恨何須勝瘴與輕身

浩然齊雅談黃伯樞榮  
仲讀馬援傳詩云云

繆蟾

字升之壽寧人紹定二年進士

應舉早行

半戀家山半戀牀起來顛倒著衣裳鐘聲遠和雞聲  
雜燈影斜侵劍影光路崎嶇今憑竹杖月朦朧處認  
梅香功名苦我雙闕足踏破前橋幾板霜

福寧府志

盛文韶

字景聲一字景成吳江人紹定二年進士知上

饒縣

梅花

翠羽啁啾夜空山。偃蹇時看人多冷。眼出手盡高枝  
香細巡檐得寒深。踏雪知紛紛。後來者紅紫莫矜奇。

見松陵詩  
徵前編

游清夫

建安人紹定二年進士官知錄

閱武喜晴和厲寺正韻

閱武堂前宿雨晴。柳營刁斗五更鳴。風生貔虎誇身健。  
日射旌旗照眼明。管領春光三月暮。雕鏤詩句十分清。  
折衝樽俎今餘事。自有胸中十萬兵。截江網

戴逸卿

黃岩人字清叔紹定二年進士淳祐九年知東陽縣性瀟洒以簡易爲政人甚重之

回香閣

邑事日墳委汨汨勞其生攬衣登茲樓便覺神思清茂林鬱松桂好山列簷楹景物自蕭洒有酒誰共傾故園隔蒼嶺行當脫塵纓

東陽縣志

葉明

晉江人紹定二年進士官監鎮

和陳子華武夷築精舍

袞袞諸公臺省居可怜無地着吾廬前因本是四禪  
派今日相追九老圖憂顧全閩曾倚重誅鋤遺孽豈  
容逋兎葵燕麥玄都滿休憶桃霞映綠湖

題馮唐廟

于百年來漢老郎曉來燈火晚來香庭前不用尋碑  
記已載班書數十行截江網

徐圓老

字孝孫紹定二年進士淳祐初仕至朝散大夫  
祕書少監致仕還鄉後復徵不起學者稱尙齋

先生

宋詩六十七  
仙人石

花開炫紅霞景接長春壑終古斯石存蒼苔涴雙脚  
安得洞仙來口遊跨白鶴

宜黃縣志

高斯得

字不妄印州蒲江人寓居湖州紹定二年進士  
官至簽書樞密院事事迹詳湖州府志寓賢傳  
春日偶成

七年高卧雪溪濱閱盡諸公上要津共怪朝無書一  
字甯知項有鐵千觔淵明肯仕義熙世劉老要完元  
祐人四壁新堂基已就從今飽挹洞庭春

清堂類稿

周端常

紹定間以從仕郎爲仙遊尉

梅林

一官負弩精神小兩木成林氣象清且道將軍能止渴正應宰相作和羹

興化府志

林雲

紹定間以迪功郎爲仙遊尉

仙水廟

天風吹我上瑤臺滿眼煙霞掃不開藥竈無丹人已去洞霄有樹鶴還來溪聲晴帶三秋雨山色青無半

點埃更愛夜深清夢斷碧紗明月映蒼苔

興化府志

宋詩紀事補遺卷之六十七 男內閣中書樹屏校

宋詩紀事補遺卷之六十八

歸安陸心源續編

胡大成

江西吉水人紹定二年進士

遊龍光寺

香宇依空結虛軒旁水開沙明鴻影度逕靜竹風來  
午磬傳清梵晴花點綠苔寥寥人境外宴坐送餘杯

南昌府志

焦煥炎

字晦甫太平人炳炎弟紹定二年擢武榜第一

禦邊多顯效仕至鎮江太守

題黃山送別圖

我家黃山隅不識黃山面不自到黃山見圖如不見  
如何黃山客又別黃山去落日晚烟昏黃山在何處  
黃山有湯泉可以洗滌塵世緣黃山有瑤草可以餌  
之長不老黃山有神丹得之可以超塵寰胡爲別郤  
黃山去祇把生絰寫空翠黃山志

鄭思忱

字景千泉州人紹定二年以宣教郎知崇安縣  
以譖左遷浦城丞真文忠薦等復官仕至檢院

句

讀罷西銘日未斜

崇安縣志

豐  
薩

鄞縣人原名芸紹定三年進士開慶元年官廣  
西提刑兼提舉

閩相可翁先生偕王人有湖山游獲侍坐先  
生有詩輒用韻

西郊陪袞繡雲步八千山行樂五星聚浮生半日閒  
尋棋楓葉下載酒藕花間譚笑長城在何人敢度關  
宋詩拾遺

陳敗

紹定四年知新城縣時民困於茶租錢敗爲疏  
請特與蠲二千八百貫不強其所無

春波亭

翼然溪濱一亭新漱灑波光巧樣春一舸月明魚射  
宿數帆風飽客知津沙侵鷺磧猶含潤花點魚天不  
受塵莫聽陽關始拼醉好將酩酊付芳辰

新城志

聞人宇

嘉興人紹定四年以上舍釋褐

海鹽鹿苑寺

郡邑相望路半停屹然香刹聳林坰罷參釋子忘情  
久應供胡僧入夢靈東去無情波濤繞西來有意柏  
慈青定知俗駕經過少月上松扉不用局 橋李詩繫

石祖文

紹定四年江陰軍簽判

君山

遠邇朝宗勢拱辰名高豈特爲春申孤峯堆阜無多  
地一水仙凡隔幾塵簪履三于誰念楚山河百二漫  
誇秦雲烟勝概無今古俯仰休悲迹已陳 江陰縣志

季子廟

夫子南遊不到吳殷勤題識寄嗟吁干戈擾擾憐諸  
夏季子流風過耳無

常州府志

戴埴

鄞縣人進士詳儀顧堂題跋

和王教暮春出遊

矯矯雪霜心孤貞受命獨留滯染綯塵垢面不穢沐  
背城借一戰墳塹輸前瀆葵心向朝陽晞光不能燠  
徒囂終無羸驅馳惟僕僕豈無豐水滋永嗟非佳穀  
呼爾就芻秣羈繫駒犢堪羨我良朋林桂賸芳馥  
博覽繹故書胸中三萬軸悠然西湖上日與英俊逐

振鐸揚儒風函丈紛冠服師友遞響答循誘教匪朴

精進日千里目駭地脈縮顧我闢黨徒無成坐欲速

披襟莫奮飛隨羣被私淑榜然藜蒐腸殊未飽公餗

彈鉶何時歸涎沫流肌內遙想烹太牢殷勤羹采菽

詩箋采菽所以筆  
太牢待君子也

更當春暮時沿沂衿佩肅心賞弄

篇章絕唱清風穆流水諧朱弦押強破萬竹孝先謾

耐嘲橫榻便空腹安識物外遊幽賞機緣熟矧復有

良儔堅久渝晚覺依然蒼筤叢檀樂旁淇澳

補韻澳亦作奧

荆公一縊荷起子明珠得盈掬大雅久不作疏越鼓

凡日迎風挹回瀾淨洗塵翳巍披闋不停手豈復憚

詩復自笑詩思慳企山纔抵蘆正望使南印象馬來  
天竺競病安能賡振紙空瑟篴絕影天邊鴻坐因家  
池鷺搜索縱成篇無異蟲蠹木所幸情不違合并在  
旦夙願言戒逝糧出晝勿三宿

輦下曲

舊來聞說京師樂香街十里春風箔朝踏金梯入鳳  
樓暮下瓊鈎延翠幄綠梅花裝淑質蘭蕙芳笙歌  
棗下曲琵琶陌上桑宿醉未解鶯催曉玉珂策馬  
長安道解珮遺簪日日歡不覺紅顏醉中老我謂京  
師皆繁華何時飛走登雲車誰知著足緇塵底八年

飄泊空咨嗟蕭蕭竹窗風暗度耿耿蘭缸燈自語孤  
坐逢掖凝清霜獨卧重衾踏寒雨雲雨陽臺夢不成  
況欲綺席羅傾城丈人屋上烏啼夜乾鵲巢中鳩喚  
晴啼夜夜未央娟娟素月明喚晴晴未霽寂寂青春  
深鳩喚烏啼終有侶猶勝月兔孀居千萬春

霜

亥默執徐歲月律終無射京師連雨雹小者如彈大  
者如拳林柯葉亂下鳥鳶折飛翩屋瓦砉劃遭擊撲  
居人顛沛行道錯愕初疑巨颶掀捲馮夷宮淵珍散  
墮光閃爍復疑清霄萬里驅長蛟泣淚盈盈驟飄薄

稜層水精碎噴噀珠琲滑有識觀天巧一何景象惡  
嘗聞聖人在上冬夏無愆伏亭毒二氣不相剝破塊  
封條已無異祉羽無勞驗風角今天子握極衡運斗  
樞景化豫順羣慝薰灼精祲胡未孚冰雨墮霄幕其  
欲霑廣澤胡不爲甘霖沾勺枯焦重甲坼其欲膏土  
脈胡不爲晞薤厭浥瀼瀼普漸洽其欲表誅伐胡不  
爲皚靄駟見而震草木黃落其欲弭蟄蟲滋生植胡  
不爲嘉平之三白驅蝗入地千百尺或云水氣專一  
不解散胡不爲長河玉岸之寒冰可納凌室助頽刷  
或云陰氣脅陽不相入胡不爲氤氳五色之卿靄叶

應豐穰昭帝德此雹舒不如雨露慘不如霜雪結不如冰澌之嚴沴散不如雲霧之慈鬱天非欲示懲詎用作戲劇漢儒說證應紛紛太不一或賢邪易位或賦歛苛刻或妻妾失倫或大臣擅法天道幽且渺牽附多穿鑿仲尼百世師麟經戒侵逼此變凡在書公室浸衰削自下凌上曰僭以柔變剛曰剝拂湯湛冷泉凝寒勝燠熱溫雨受陰氣凌沴自然結時當秋氣杪是理尤彰灼風起庚庚作令日行酉酉主殺數至九變金乃從革大則爲兵小刑罰內外靡不以時決天地方會藏沴候生京洛得非少皞執矩未潔齊得

非萼收爲正有顛錯得非箕伯吞聲不掃除青女護  
姦不除滅穹旻赫然奮嚴威重陰膠固紛零落我願  
聖王觀此攬乾綱用夬決登俊良屏邪慝陰塵淨掃  
單于庭陽和徧歛鄒子律大明威威照九州寒燠時  
序百穀熟天若雨珠真可嘵請以綴袞冕之十二旒  
龍旂和鸞之纓絡

彗星

紹定壬辰閏九月己酉之夜彗星出清臺奏御正衙  
避席太官減膳羞鼓宗徹音樂雞笑肆眚出囚繫龍  
辰責躬求讜直精誠徹九垓德音走重譯園橋冠帶

齋鹽生筭窺熿熿對以臆臣聞泰素朕形元黃辨色  
左旋右轉一闡一闢來伸往屈四時行除舊布新寒  
暑易恢恢天網疎統理廢厥職東方歲星木主仁不  
掃暴刻尙搥剝南方熒惑火主禮不掃驕蹇習凌弱  
西方太白金主義不掃寇盜生亂略北方辰星水主  
智不掃蒙蔽長讒慝中央填星土主信不掃詐欺滋  
姦猾皇穹遴選綱紀星出持彗帚掃環域日華機上  
有九彗乍上乍下空如筆歸邪向上有兩彗出也不  
行見則滅天狗短彗在尾傍火光炎炎空煊赫天攬  
類彗雲如斗蚩尤類彗箕後曲六賊如彗在西方咸

漢帶彗居正北驅策舉莫前彗乃排膠轄不指心  
明堂位不臨箕尾后妃宅不抵參昴詠衾裯不向牛  
女逐遙佚不訪獄廩至婁胃不詢蓋營到危室不求  
社廟上井鬼不好文章遊奎壁不窮天根越亢氐不  
咨弋猶來柳畢不從玄枵問虛耗不由張素勺觴客  
不自觜觿訪葆旅不入柳倉覓厨食不呼七星問急  
事不召南斗共斟酌天王帝廷爲大角兩旁三星如  
鼎足斗柄所指以建時節曰攝提格酒掃庭內萬化  
基蕪穢不治孰觀法軫驅風車爲宰輔負衡失平在  
修飾翼鼓羽翮主變夷飛翰不勁必振刷禿毫一加

內清外肅四海九州罔不臣妾帝座中居幹樞機萬  
年千載不停息

和陳府教授見贈

遺風洙泗濱汲古酌犧鑄魚躍池藻翻鶯呼庭樹暄

樂山不樂水居城猶居村一朝黃鐘鳴九畹滋蘭根

以上江

湖後集

韓伯修

字子長霞浦人紹定五年進士

洪山

壁立東南第一峯問知名道葛仙翁丹砂竈逼雲頭

近玉井泉流海眼通六字籀文天篆刻數間洞室石  
帡幪我來整屐層巔上無數羣山立下峯

梅花坡

休問桃源路等梅顛往還梅花有知己何必定湖山  
福寧府志

洪揚祖

淳安人紹定五年進士官正字

高齋桂窟

植桂不在多種德如種樹前人能種後人傳自有清  
陰滿庭戶高枝凌雲低覆欄晴光翠色生晝寒人家

多愛種桃李幾日春風紅滿地何如此花開獨遲蟾  
宮窟外秋香細課兒讀書書滿牀更將幽興滿壺觴  
半酣獨卧高齋下啼鳥數聲清晝長

福安縣志

黃履翁

字吉甫福建寧德人紹定五年進士

支提禪寺

福地由來此最幽翠微深鎖碧山頭參差梵閣雲常  
護隱現神燈夜不收面壁幾人曾入定摩崖有客記  
同遊從今悟道支提處知是名高十二樓

寧德志

林經德

字伯大福州候官人紹定五年進士太學博士  
建平宰後知邵武軍

挽胡季昭

扶植綱常抗直聲白頭不憚嶺南行書云惟孝友兄弟臣罪當誅王聖明削籍投荒從寶慶陟階錄後賴端平朝家賜謚今方舉凜凜孤忠死亦生見象臺  
百末

楊 謄

字淳夫霞浦人紹定五年進士官崇安令

馬冠山

陳家宅廢桑畦暗馬道冠亡羽觀空惟有山南古程

氏雕簷一口翠烟中

福寧府志

俞桂

字晞鄰仁和人紹定五年進士嘗守海濱政劇  
民頑理之裕如不廢吟咏與吳惟信陳起相往  
復有漁溪詩藁三卷

靈隱山

回首得兩年曾入靈隱去一路看不足衣沾松上露  
白雲來相迎澗泉飛瀑素此景天下無遠勝廬山路

西湖

花事已成休都人懶出游水添烟浪潤山帶夕陽愁

柳樹鳴黃鳥沙堤卧白鷗不辭歸路遠何必買扁舟

冷泉亭

步入侵雲嶺亭高路恰平池邊幽樹占水底細沙明  
無友詩難咏逢僧話轉清此中真勝地林寂鳥無聲

錢塘縣志

惜春

春事三分過二分桃花水上覓紅雲遊人浪說春歸去  
柳外黃鸝尙自吟

東山

東山隨分作生涯卽是清高隱者家麤有小園供日

涉不愁無地種梅花

夏晨偶作

蠶事行將了農家刈麥初雨慳林少笱水澗港無魚  
因病常懲酒偷閑懶答書今年身愈老事事覺全疎

苦錢

庭砌方圓出化鈞何須抵死論錢神貧家阿堵新添  
富買斷西湖風月春

江頭

漁浦山邊白鷺飛西興渡口夕陽微等閑更上層樓  
望貪看江潮不肯歸

春日卽事

羲馭舒徐日正遲園林已覺杏花稀半晴半雨春無  
準燕怯輕寒不耐飛

采蓮曲

畫艇將歸笑語頻鴛鴦對對起還沈妾心先自懷郎  
苦怕嚼蓮心苦轉深

卽事

吹落楊花春事了小池新綠雨添痕浴蠶時節寒猶  
在村落人家半掩門

江上

小雨纔收日漸斜酒旗插處兩三家江頭裝點秋來  
景半是蘆花半蓼花

秋日

芙蓉未折挂香浮落日西風鴈過樓一雨空增深夜  
滴十分秋是十分愁

雨後

雨後新晴日轉西桑間猶有拙鳩啼十分愁意無人  
管紅蓼黃蘆水滿溪

紀愁

可笑無詩紀四愁強將歡伯解吾憂夜長明月紗窗

冷分得寒葢一半秋

寓歸

水激長江浪風傳遠寺鐘宦情秋意薄歸興客愁濃  
卷箔迎新鴈喧籬厭舊葢何時旋故里載酒插芙蓉

漁溪詩稿

汪應晦

字世顯歙人紹定五年進士

次韻武侯廟

武侯遺廟自丹青霸業銷磨但故城北魏中分盟血  
在南陽三顧夙心盟君臣際會宜興漢吳蜀相資失

借荆獨致瓣香思祀典西山回首暮雲生

新安文獻志

范 坦

字伯履河南人集賢殿修撰知洪州兼江西安撫使大觀二年任

題延慶寺

烟靄水寺若江湖林麓山川入畫圖壁上薰風爲誰  
製柄臣曾此耀歸途

寺閣涵虛跨碧潭菰蒲楓柳認江南侍臣家世俱遊  
此鴈敍題名在壁龕

懷慶府志

鄭 芬

芬貴溪人紹定五年進士

早春汪若水宋壽谷見過

雲起松洋路吾廬蹴水開故人嫌俗縛雙騎出城來  
春晝散微雨隣家多早梅彈琴徵古調何處可登臺

江西詩徵

吳文震

字欲發番禺人紹定壬辰進士試鬱林州司戶  
權尹又任南恩州司法授新昌通判知歸善縣  
等倅欽州攝守全州湖廣舂陵咸有惠愛

題半月巖

靈通一竅如月未全盈外山河界中涵蚌蛤精  
銀潢斜口斷玉斧半修成莫訝平分破難虧半體明  
粵詩蒐逸

婁續祖

嘉興人紹定六年爲永州郡丞

題永州澹巖

嵒局寂寂幾經春中有神僊隔世塵不假棟梁爲大  
廈盡藏今古往來春湖南通志  
金石畧

經浯溪作

□□□□□浯溪來讀元家頌德碑遺□□□靈武

事口司徒口口口口口復開元口口口口口口口  
口口口無臯聞宜戒口口口口口詩局上

衛樵

字山甫崑山人涇之次子紹定癸巳知永州崑  
山志言其魁銓闈魁鎖廳終于知信州

寄題中興頌下

鼎沸漁陽塞馬鳴中興鴻業幸天成且爲當世邦家  
計寧問他時父子情李郭功名無可減元顏文字有  
何評若能銘刻燕然石方許雌黃此頌聲湖南通志  
金石畧

澹岩

嵌巖洞谷到曾多無奈冥搜暗索何此處雲穿風月  
透短筇渾不待捫蘿

慚愧州家一事無薄遊還愛小蓬壺若憑妙筆丹青  
寫應勝從來八景圖

零陵縣志金石

蕭財

屑有

送弟赴省

河南蕭氏梁文物鶴在九臯無數鳴小山羽翮日絢  
練膽氣也作虹霓橫掛冠亭後冷如水舊壇半是蛛  
絲縈恩袍謾官直齋老書院誤身吟院兄鳳樓好手  
乃有弟鐵聲錚錚亦妙器鄉里浪傳輕薄名兒曹豈

知渠大意惠子五車稷下困仲連一箭聊城至博懸  
於投呼得盧莫以蔡齊故弟二聖朝新數中興年進  
士蛻骨秋風蟬梅花魁春導人去竹葉廳寒澆客眠  
天方坐我茅三椽留眼送爾宜鴻前因行西湖叫和  
靜爲言詩苦贋狂顛載江網

范子長

一作子庚

丹稜人紹定中官至朝散大夫利州路提刑

南亭

花木精神面面金誰將好景作南亭栗留枝上春風  
思鵠鳩聲中蛻屐痕簷後梅樊兄及弟檻前竹鶴子

生孫我今猶是數旬客遇意忻時卽打門

眉州屬志

曾原一 厥有

同戴石屏十人重遊分韻得鑿字卽席賦

綫逕盤廻老壁出參錯洞深路欲無且進還憐愕  
太虛墮萍波有此奇偉作芮也勞斧斤此語失之鑿  
闢崖溼生雲泉雜雲影落殿頭何時仙怡然騎木鶴

金精歌

元都捲雨翻東溟萬華變滅如輕塵雹拳破瓦萬甲  
疾癱恐天地今無春東來一馬當軒下雲葉眇剝天  
痕青雲開衡嶽韓子到此事恍惚今難憑桃源有路

不可入桃花影絕那得尋  
喳喳鳴鵠跋鳥起豈子偉  
語回滄溟聯騎瘦蹇踏脆綠見者謂我椒庭人瑤琴  
飛響暗雪瀑傑句泣晝逃山精胸蟠玉虹世李白筆  
舞鐵鎖今顏卿飛仙遺章出天韻引觴清酌球琳鳴  
泉搊搊兮靈鼓山崇崇兮太古神明有舍炳萬象何  
處人間非紫府靈根元元貫元氣瞬睫蓬萊無弱水  
雲襟襟露泚泚米珠籠兮方杯橘社同兮角里贛州  
府志戴飛

字子翬號宓齋紹定間任廬江縣尉  
寓杭次族人催歸詩韻

休把詩來只管催也曾對菊賦歸來閑雲自笑出山去未雨如何便得回

石屏詩集附錄

陳文孫

紹定中惠州別駕累官朝奉卽知封州

寄莫道人

林木自春蘭自芽遊山過我興何賒鐵橋問徑最高頂石洞開雲隨處家人訝長年能綠髮我知真性卽丹砂談鋒未了歸途速一雨洗塵清可涯

暫閑吏債訪仙居雲亦隨人爲卷舒桑下忽逢三度宿腹中如飽十年書哦詩對酒誰知我食柏餐霞

任渠底事若能無障礙不愁無地着吾廬

羅浮山志

李茂先

紹定間南恩州教授

遊靈巖

雪巖偶得片時留傾倒清樽興未休香積等常分藥水禪林自昔枕江流羊腸盤轉層崖蔭山腹空懸古洞幽談笑相逢情更厚何當攜手約重遊

漢南府志

馮袞然

紹定中隴右人

紹定三載春正中隴右馮袞然以戒備程

藝於有司弟熾執別近郊連轡攀齊山之巔  
是時也積雪新霽玉峯橫陳酒闌語別之餘  
索筆題詩寫區區相勉之私壯哉行也因命  
工鐫石且以紀歲月云

萬山森玉寒如削一騎奔塵去欲飛路濶並鞍同笑  
語酒酣執手話依違英名他日垂青史好語今朝紀  
翠微三月錢塘江上道莫歌金縷易忘歸齊山岩洞志壽字岩

崖

袁 鎮

字安之紹定時永陵人

遊澹巖偶得二絕

誰道靈仙擘不開天然瓊室與瑤臺涪翁句重曾相識  
料想烟霞許我來

石門定與玉京連曾著方壺不老仙猶有當年丹竈  
在空岩寂寂鎖寒烟

零陵縣志金石

施梓人

青陽人紹定中由徵辟官漢陽軍儒學敎諭

葛稚川煉丹室

暇日肩輿上翠微烟光巒氣濕人衣桃花片片隨流  
去巖漏泠泠作雨飛丹井稚川成藥處雙峯膝子讀

書基觀音閣上清風爽擬我諸公吟未歸九華山志

游九功

厲有

棄官歸故廬

野塘漫漫板橋東家在春風試畝中墮草不芟新織  
翠庭花初種小開紅酒嘗村釀餘酸味詩乏才華有  
淡工鄰里相過無雜語但云饑後慶年豐

送常老住疎山

師住疎山祇樹園卧看雲霧起江村百年鼎鼎春風  
轉一鉢垂垂老眼昏古殿撲空參鐵鳳夜潭翻月落  
金盤何時繫纜西風下松柏陰陰獨扣門截江網

劉煥叔

莆田人端平元年知吉州嘉熙間福建市舶提舉

上陳招使

天戈一指迅雷轟涌雪公應記洗兵伊洛風烟想如  
舊江淮草木轉知名爭先識面今裴度孰與論心昔  
孔明文水萬家惟擊壤得無軍餉盡歸耕截江網

潘

昉

屑有

涵空閣

危欄貪倚眺薄暮不能休直下疑無地滿前都是秋

晚山平入畫新月側當樓莫說興亡事吟人本白頭

虎邱分韻得落字

急雨成快晴晚日射林薄院靜轔轔聲崖古枇杷落  
澄泓有潛鱗寥廓無歸鶴明年當掛冠吾志在邱壑

次陳仲文八月十二夜韻

癡雲吹盡月行天新琢冰輪欠半邊須信缺中元不  
缺便教圓處可長圓寒生沙渚雁初下冷浸紗窗人  
未眠萬事虛盈皆此類幾看如鏡復如弦

雪中聽綿州鄧道士琴

黃冠家萬里忽此動瑤琴歲暮多風雪天涯少信音

淒涼當日事寂寥此時心我醉君休去蒲團共夜深

書趙知院墨梅後

疎葉暗藏春意足橫枝老閱歲華深廣平能賦君能  
畫總是平生鐵石人

以上詩苑衆芳

張同甫

字孟莊仙居人端平二年進士方正寡諧託疾

歸隱

湯公洞

萬點波光映古邱林深雲鎖洞明秋是誰訂我重來

約攜手相將到白頭

仙居縣志

鄭寅

字子敬仙遊人以父任補官厯知吉州端平初  
召爲左司郎中權樞密院副都承旨出知漳州  
卒

南峯書堂

地阻一區古山高兩際深弓旌已陳迹泉石尙餘音  
若不登精舍何因見古心仙遊縣志

李丑父

號亭山興化人端平二年進士有亭山集

城山國清塘

平田一水自縈迴喜見茲塘亦壯哉夏潦久收猶浩渺壺山近看更崔巍刺船葑蓼中邊去喚月烟嵐外

面來見說艾軒詩句好不逢墨迹重徘徊

興化府志

送國子博士鄭僕

諸生幸不笑韓愈官長何因罵鄭虔

蘭陔詩話

宋詩紀事補遺卷之六十八

男內閣中書樹屏校